

• 福建文史叢書 •

福建省文史研究館 整理

全閩詩錄

四

福建文史叢書

全閩詩錄

(四)

〔清〕

鄭

杰等輯錄



海峽出版發行集團
THE STRAIT PUBLISHING & DISTRIBUTING GROUP
福建人民出版社

全
閩
明
詩
傳
(下)

楊 郭
浚 柏
 蒼

錄

全閩明詩傳 卷三十六 萬曆朝七

侯官 郭柏蒼 錄

楊 浚

陳薦夫

名邦藻，字幼孺，輔之子，价夫弟，見上。閩縣人，萬曆二十二年舉人。有《水明樓集》。按：薦夫居福州南門下渡，其所營招隱樓今入民居。

曹學佺《水明樓詩序》：水明樓者，取杜少陵「四更山吐月，殘夜水明樓」之句也。少陵樓止夔峽，無人晤語，中夜懷歸，展轉不寐。嘗曰：「客睡何曾著，秋天不肯明。」忽然而現此境，成此句，不知其所以然，似鬼似仙，又有似於禪，在人遇之耳。東坡曰：「精氣爲魄，魄爲鬼；志氣爲魂，魂爲神。」衆人之志不出於飲食，男女之間與凡養生之資。其資厚者其氣張，其資約者其氣微，故氣勝志而爲魄。聖賢則不然，以志一氣，清明在躬，志氣如神。雖祿之以天下，窮至於匹夫，無所損益也。故志勝氣而爲魂。試論子美當日之受用，其爲飲食男女乎？其養生之資，厚且約乎？其所以祿之、窮之者，有損益乎？「四更山吐月，殘夜水明樓」之句，似抑怨爲鬼乎？亦清揚爲仙

乎？至今千百世而下，信體魄之凝滯於物乎？亦吟魂之虛明無寄乎？故余亦曰：子美之詩非有異於人，其所以爲志者異也。然子美自言「入夔之後，於律轉細。」子美平生雖不談禪，而詩不窮不工，禪不窮不精，詩不涉議論則細，禪不著見聞則圓。其開揆殆有合焉。人之一身，志與氣恆相勝，魂與魄若遞換，而以達者論之，一身而有二物，無是理也。故人不深乎禪理者，未有知詩者也。予友陳幼孺，少孤而貧，三十始爲諸生，領鄉書應試南宮，不第而歸。貧益甚，至喪厥明。末年病嘔而死。其所爲養生之資，飲食、男女之欲，約而且廢矣。獨於詩之道，負俊才而專一志。質癯而腹腴，語險而法中。雖目不涉《詩》《書》，跡不交山水者十有餘載，然下帷之夫駭其博雅，好遊之士推其韻致矣。倘所謂閉門造車，出門合轍者耶？幼孺臨終時謂王粹夫曰：「若能始者，吾死後魂魄猶依此君也。」噫！吾友之魂魄豈能舍是詩。予今爲之序如此，亦足以復幼孺矣。

《竹窓雜錄》：陳幼孺既舉孝廉，貧日益甚。偶謁一當道，令其咏《點額盆魚》，幼孺云：「盆池影裏波紋下，一片朱砂鶴頂圓。爲是龍門掙不上，至今搖尾乞人憐。」

《小草齋詩話》：陳幼孺工麗宛至，却自中、晚得來，與徐惟和、鄧汝高皆巨擘也，相次夭折。悲夫！

《閩中錄》：幼孺三上春官不第，病日雙瞽。蒼按：薦夫病瞽，禱於善溪白馬王曰：「枯眸雙瞽，空縹三載醫方；朽質僅存，何補九年賢籍。」按：薦夫卒年五十一，生於嘉靖庚申，卒於萬曆庚戌。兄弟自相酬倡。桐城阮自華贈詩曰：「孝廉宿憤世，遁景棲深宮。親朋希得見，杯酒將誰同。」

擬古怨

涉江采蘅杜，出江思君子。既無歡愛情，空然抱心素。靡蕪晚失時，紈扇秋如水。促織鳴牀前，螻蛄哀砌底。寒霜凋空林，涼月皎沙渚。遺思結寒燈，淫魂亂秋杵。失意既無當，惠妍良獻醜。

秋夜遲友人不至

秋宵何沉沉，松陰落寒瓦。蟋蟀喧中堂，繁蟲泣深夜。素月清以娟，白露杳然下。之子望不來，但恐秋風謝。

映水曲

舞鸞出匣迎春風，柳絲妬綠桃嬌紅。顧影低鬟曲塘上，金渠裏外雙芙蓉。繡領斜明酥頸皙，澄波對射眩空碧。冰盤不漾粉紅香，一團春水桃花色。

石竹山

按：在福清縣。

古洞紫雲扃，荒臺閣摘星。月高牕湧白，樹密檻流青。竈冷丹砂候，山餘赤鯉形。

由來塵土夢，那許接仙靈。

春日雨中屠田叔使君招集鄰胥臺同錢叔達、徐惟和、惟起、王粹夫

仄徑蹋香泥，薜蘿一望齊。臺登疏雨背，塔拄亂雲西。却蓋依松色，停驂讓鳥啼。山公新理詠，不唱白銅鞮。

夜投瑞巖寺

按：在福清縣。

海色蒼蒼白露寒，征途初倦叩禪關。似聞僧語青冥上，忽見牕開黃葉間。清梵聽來山月曉，荷衣溼盡嶺雲還。心知淨境難留滯，坐向繩牀一夕閑。

海口城晚望

按：在福清縣。

蒹葭靄靄樹蒼蒼，平楚閑看益渺茫。驛路遠山多落木，孤城臨水易斜陽。潮回近浦寒生雨，雁度遙天夜帶霜。慙息征鞍溟海上，烟波千里斷人腸。

漁梁道中懷鄧汝高民部，徐惟和、曹能始二孝廉

梅花松影兩參差，不見前村賣酒旗。馬嘶雪殘將盡草，猿啼霜後最枯枝。幾家山館迎春早，萬里王程到日遲。雖是別離腸欲斷，却憐京國有新知。

伯孺兄之吳興寄謝在杭

郡志載謝在杭性吝嗇，陳价夫往姑蘇，告行於徐惟和，和作詩書箋贈之兼束在杭。囑云：『若告歸日，行囊蕭瑟，取吾箋令見之。』詩云：『離筵酒盡即他鄉，豈爲分携始斷腸。失路客身輕似葉，倚門親鬢白於霜。歸裝不望中人產，內顧先營百日糧。未必綈袍能解贈，秋風先囑寄衣裳。』及往，果如言。在杭挈而觀之，曰：『惟和度我，我適有不及矣。』留伯孺數時，厚禮而歸之。

若雪東來繞郡城，碧流雙照使君清。公庭事向湖間了，澤國春惟水畔行。桑翳人烟蠶有禁，樹涼官閣鳥無聲。夢中遠道青青草，去傍君家池上生。

送溫永叔郡丞擢守南甯

清朝早郡十年時，千里專城去有期。洞裏匏笙蠻部落，雲邊銅鼓漢官儀。江祠驗歲

憑鷄卜，野館行春借鹿隨。幸與交州山色近，知君到日去檐帷。

送李伯韓孝廉之蘇州

君去長洲綠漸繁，憑將往事吊空門。虎邱不散黃金氣，鶴市還歸紫玉魂。柳絮輕煙迷社燕，荻芽新水上河豚。館娃宮畔梨花月，更與東風倒一樽。

聞雁懷陳汝大

水國秋風霜葉飛，忽聞南雁一聲歸。知君此夜頭應白，無數啼痕上客衣。

晚次白沙驛懷諸同社

鴈落孤帆夕照斜，八千里路遠辭家。故人相送各歸去，只有寒潮到白沙。

陳汝大

按：汝大名椿。

汝大本修能，矯節復無比。握手見丹衷，微言動傾耳。麗藻挾春華，清心映秋水。刻意絕陳言，虛懷故開美。以茲富奇辭，往往絕常理。青鳥有遺經，頗暢幽玄旨。博物

非外求，聊以觀吾始。

陳汝翔

按：汝翔名鳴鶴。

汝翔倜儻士，結屋柯山麓。希範上世人，形骸皆土木。著書摘窮愁，因之廢櫛沐。既推孟嘗產，應甘仲由菽。憤世日放懷，時時見衷曲。能爲魏晉言，詞林競推服。屈首諸生間，顧影良已促。懷哉捧檄心，俛仰豈所欲。

徐惟和

按：惟和名燧。

大徐吾同調，蚤歲稟英特。居常好遨遊，一一窮阡陌。探討了不聞，廼反富經籍。既解匡生詩，亦善梁丘易。起家應孝廉，徒步射奇策。魚目混隨珠，高雲鍛長翮。齊瑟不爲竽，荆山豈終石。物固有推移，君情無怵迫。

徐惟起

按：惟起名塙。

徐生抱壯圖，體質何獨變。退若不勝衣，允矣明時彥。擁書數萬卷，何假百城面。探蹟詎言疲，登臨不知倦。析理采腴辭，論交存片善。直是清虛來，非與紛華戰。勉旃

賦子虛，還期漢廷薦。

平夫兄

按：平夫名邦注。

大兄性豪爽，不滓泥與淖。平生羣從中，束髮頗同調。孱然五尺軀，矜莊成峻峭。應對時復忘，瞪目但清嘯。才思顧便捷，神情亦要妙。映竹洛中吟，臨流東海釣。永言遺世心，豈恤俗士笑。

伯孺兄

按：伯孺名价夫。

天乎余何辜，少小遭閔兇。寡母提二孤，慟絕無生容。伯也有至性，鞠子哀余躬。勞苦每獨先，饑寒時與同。弱冠涉文藝，名理豁然通。聲詩有頓悟，掃素無良工。曰余驚鈍資，諄諄爲發蒙。行誼日提挈，名節相磨礪。嗟哉吾何執，奉以慎厥終。

司命問答

問司命：身是鷗偃羣，所願固不長。願得二頃田，兼有百樹桑。草屋廣一區，乃在溪澗傍。比鄰五六賢，合志復同方。伏臘無杯盤，漉酒烹肥羊。一童給薪水，一婢御厨

房。晚行當巾車，無病足力强。圖書三萬卷，妻妾慎閉藏。大兒能力田，中兒能文章。復有最少兒，嬌笑嬉中堂。監司不多事，縣令復循良。詔書間歲下，強半蠲租糧。最上比胥覈，卻下無黃唐。逍遙七十年，還歸無何鄉。在我固不泰，於君亦無妨。

司命答：君情何太癡，樂事安可全。生角不復齒，高飛那得蠓。有手不能行，有足不能拳。造物非不厚，賦命當自偏。季子列侯相，留情負郭田。沮溺才耦耕，那得比鄰賢。淵明五男兒，長幼誰可憐。犢牧歎雙雉，琴瑟無復緣。殤子困朝菌，豈不願永年。唐虞去不返，何啻天與淵。君懷如可畢，君願如可兼。司命請自行，高賢莫垂涎。

桑溪修禊詩有引

桑溪在閩郡東，故王無諸禊飲之所。惟和考郡志得之。日在上巳，約同社流觴，遠循舊事，人賦四、五言各一章，爲圖而系之。

東風扇陽和，景物相鮮新。緬想修禊期，往跡今已陳。東郊有遺址，張飲傳甌閩。如何千載後，寥寥無斯人。伊余異代士，攬古披荆榛。言尋二三子，卻過桑溪濱。飛觴汎流花，傍巖鋪苔茵。盤開漾輕鳧，杯行雜游鱗。稍覺俯仰闊，漸與形骸親。沂上服已裁，滄浪纓未塵。念茲足奇勝，千古當斯辰。

北邙行

洛陽城東北邙路，纍纍白骨多於土。今人塚壓古人墳，富貴豪華不可聞。素車白馬賓從散，螻蛄烏鳶分強半。寒狐盜著塚中衣，飢鶻搏將孟裏飯。白楊蕭颯風霜老，旒旌飄零棄衰草。野鳥諳歌薤露聲，甯知此曲傷懷抱。何年碑字尚煢煢，磨與新墳改勒銘。山鬼讀碑剔燐火，漆燈歲久那能明。城中居人聚如蟻，十九身歸北邙裏。今人爭吊昔時人，昔人昔日曾如此。北邙抔土無寸閑，得葬北邙人亦難。君不見腥風血雨沙場客，欲向此中那可得。

山行懷汝翔

鳥道勢盤空，林疏葉墮紅。客行山色裏，路入水聲中。畚火燒殘雪，人烟背北風。所嗟丘壑興，不得與君同。

同王震父熙工舅遊名山室

按：在永福縣。

蘿徑繞孤峰，珠林隱梵宮。路尋白雲處，人在翠濤中。古洞閉殘雪，水簾開晚風。

共將真妄理，閒坐叩支公。

村居寄徐大惟和

幽居水石中，漸與野人同。竹密齋長掩，溪迴路不窮。愁成耽酒癖，病減讀書功。爲問山陰侶，何時向剡東。

同汝翔、興公訪振狂吸江亭

花暗竹青青，來過江上亭。酒非尋白社，書正揭黃庭。蚤韭和雲翦，新鶯過雨聽。君看今夜聚，莫是少微星。

江北旅情

薊北三春望，江南萬里愁。隴雲凝馬足，林雪澀鶯喉。野曠天垂驛，更寒月墜樓。長江將客淚，日夜向東流。

訪王百谷不值晚歸舟中遇雪

三徑蓬蒿外，蕭然是履痕。寂寥齋自掩，磨滅刺空存。暮雨河流急，孤舟雪影繁。

翻憐戴安道，興盡子猷門。

下第後呈徐惟和、文夢珠、鄧太素

寥落三春暮，飄零萬里餘。殘兵歸磧日，去婦下堂初。對客羞言命，逢人懶寄書。與君俱未悟，儒術是謀疏。

謁高賢祠

按：在福州郡治烏石山。詳徐燾傳中。

詞壇一片地，千古聚精英。墓朽孤吟骨，碑鐫大雅名。神應通後死，業不負前生。想到清宵裏，泠泠白雪聲。

哭王三少文

按：王叔魯字少文。

淒淒風雨冶城邊，往事傷心最可憐。文酒相驩才幾日，乾坤此別又千年。重泉不掩慈烏恨，綺帳應乖卜鳳緣。莫謂空山可埋玉，殘珠斷壁世爭傳。按：叔魯未娶卒。

送王少文人城西殯宮

薤露歌成不可留，長辭華屋向山邱。人隨白馬如雲散，兆有青烏計日求。暮雨寒狐

依繖帳，夕陽山鬼弔松楸。縱然相送知何處，門掩荒郊水亂流。

哭陳汝大

詩懷瀟灑酒腸寬，忽爾霜摧楚澤蘭。別館夜譚違碣石，空庭秋色夢邯鄲。新阡自相青郊塚，故里誰登白社壇。不爲詞林公議在，幾人罇俎祀儒冠。據此，則陳椿亦隨祠烏石山高賢祠。

哭徐惟和

按：徐燾遊古田，交林春秀，卒於古田。

別去家山隔數旬，重來應似夢中身。殘魂幾日相尋我，遺囑先時轉付人。抱女哀號青鬢妾，呼兒酸楚白頭親。斷腸引塵孤燈下，不得留君四十春。

聞說羸軀向玉田，長親瘴霧與嵐煙。文窮孝里千秋筆，詩絕香閨七弔篇。嶽秀降來終入地，長庚謫去竟歸天。可憐十子登壇後，一死身關二百年。玉田有林孝子，惟和爲之立傳，又作《香閨弔詩》寄余，皆絕筆也。

吳門懷古

香徑春風碧草萎，東門雙袂淚痕啼。千秋故國頻歸越，百里高城只望齊。紅粉不如

臺上鹿，錦衣曾破水邊犀。兩山翠色年年在，猶自含顰震澤西。

金陵懷古

庭花玉樹幾經秋，一片平湖只莫愁。西晉長江無鐵鎖，南朝舊國有金甌。樓臺處處橫天末，潮水年年打石頭。千載真人還定鼎，莫言王氣黯然收。

九日書懷東秦始

按：陳一元字秦始。

海國風高白雁斜，城南微漲尚涵沙。鄉心不敢羹蓴菜，蓬鬢那勝插菊花。只有扁舟堪避世，更無長鋏可爲家。桓公門客多輕薄，敢把文章誚孟嘉。

己酉初度

吳越歸人感路歧，行人五十數偏奇。浮生強半神情減，來日無多意興知。自笑桑蓬懸季月，正當蒲柳望秋時。坐中莫更歌眉壽，逼坼傷心久廢詩。

過王總管故居

故元總管王翰，字用文。元滅，念無子，未即死，退居永福山中十年，生三子。太祖聞而聘之。